

# EFESIOS

## Yí Necy Huidibí San Pablo

## Yajniguejx Je Mibijcpidíjc Jim

## Efeso

**1** Iich Pablo, Dios jadu'n tzojcp co Jesucristo ti xyajni'bicyich co n'apóstol'adipyich. Jada necy cham nguejxypich jím Efeso ma yi jäy ajcxy huidibí Dios yjäy'ajtip, yi' ajcxy huidibí mibijcp tudägy Cristo Jesús etz huidibí ajcxy yajpatp ma yi'. **2** Huen ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugihui'p ajcxy.

### *Nej je Espíritu Santo conucxy Cristo yjäy*

**3** Tzoc iibaatim capxpaatim Dios iich ajt nHuindzin Jesucristo yTeedy. Miid co nyajpaatim ma Cristo, paady Dios ti xyconuucxim miid tüg'óciy huidijaty tzomb tzajpjoty. **4** Dios ajt xyhuin'ijxim jecy'ajty, ca'ni anajty cojy macxy je naaxhuiñybí. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huädz oy njot nhuinma'ñ, ca' ti bocy nmiid'ajtim. **5** Miid co Dios ooy xychojcim xyjihuuyim, paady ycixp yi' capxcödujcy jecy'ajty, ca'ni anajty naaxhuiñybí yajcojy yaj'oyiy, co xycöbigaanim nejjihuuy yci'm y'ung. Co Dios jadu'n quejxy je Cristo ya naaxhuingíxy, chi yi' yaj'oyiy nej jëbi xycöbijcim nej yci'm y'ung, e jadu'n xymiid'adaanim tzajpjoty. Dios jadu'n ytuñ jadu'n nej yi' anajty tzocayin. **6** Tzoc iibaatim

capxpaatim Dios ooy miid co mijmay'ajt mij'oy'ajt tuuñ miid iich ajt ycixpi, co quejxy y'ung ya naaxhuiñ miid iich ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzoc yihuüy. <sup>7</sup> Miid co Dios ooy xychojcim xyjhuiiyim paady ycixpi yi' y'ung nipy teemy yojcy co y'o'cy miid ajt nbocy ycixpi, ti ajt n'alma xyajniidzoocim etz nbocy ajt ti xyhuinmeecxim. Co jadu'n ytuuñ, chi Dios mijmay'ajt mij'oy'ajt tuuñ miid iich ajt ycixpi. <sup>8</sup> Co Dios jadu'n mijmay'ajt mij'oy'ajt tuñ miid iich ajt ycixpi, ti xyajhuinjihuiiyim ti xyajnejhuiiyim yi yti'ajt yi yhuinma'ñ. <sup>9</sup> Dios yjäygidacpy jadu'n co ti xyajnejhuiiyim nej anajty miidity capxcödacy huidibi ca' pin jecy'ajty huinjihuiy. Nañ jadu'n Dios ti xyajnejhuiiyim nej ti yhuinma'ñypidacy jecy'ajty nej ytuna'ñ anajty miid Cristo. <sup>10</sup> Je huidibi Dios jecy'ajty ti yajnihuinmayiy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiy anajty co pidäga'ñ tüt'óciy huidibi yajpatp tzajpjoty etz tüt'óciy huidibi yajpatp ya naaxhuiñ ma tüt' ane'min, e je Cristo je' ane'mamb nigohuajc'adamb tüt'óciy.

<sup>11</sup> Tüt'óciy tijaty tuni yjajti jiiby tzajpjoty etz ya naaxhuiñ Dios jayijp capxcödujc. Iich ajt huidibi nyajpaatim ma Cristo, Dios ti xyhuin'ijxiim jecy'ajty co oga'n je naaxhuiñyb chondacy jigix jëbi nbaatim tüt'óciy huidibi Dios xymöhuaanim. E tüt'óciy jada nicxy yjaty tim jadu'n nej Dios jayijp capxcödujcy, e Dios ytumyb jadu'n nej yi' tzoc etz nej jäygidägy. <sup>12</sup> Jadu'n Dios cuydumyb miid iich ajt ycixpi, huidibi jayijp ti nmibijcim ti

nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios miid yi' ymij'ajtin etz yi' y'oy'ajtin ycixpi. <sup>13</sup> Nañ jadu'n miich ajcxy co mmidooy je ayuc tiy'ajt nej jëbi m'alma ñidzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy miid ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espíritu Santo huidibi Dios y'ahuaniiy jecy'ajty co xymöhuaanim. <sup>14</sup> Jada Dios yjihui'ñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'na'ñ yajnidzöga'ñ pinjaty yjäy'ajtip ajcxy. Jadu'n Dios tuna'ñ, jigix jëbi iich ajt n'iibaatim ngapxpaaatim Dios miid y'oy'ajtin ycixpi.

*Pablo mibijctzoy Dios co huen ajcxy yajmoy  
huijy'ajt cujc'ajt*

<sup>15-16</sup> Com ti nnejhuüyich jadu'n nej tiyudägy miich ajcxy ti mmibijccixy iich ajt nHuindzin Jesú, e nañ jadu'n ti nnejhuüyich jadu'n nej mdzojccixy mijihuüygixy tüt'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidaacin ma Dios miid miich ajcxy ycixpi. <sup>17</sup> Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinma'ñ je ixpijcin huidibi je Espíritu Santo yejcpy, etz nañ jadu'n xyajnejhuühiipy xyajhuinjihuühiipy ajcxy jac'oy yi' y'ayuc, e tüt'óciy nej yi' ti ytuuñ. <sup>18</sup> Dios nmibijctzooybich miid miich ajcxy ycixpi, co

xyaj'aniiyip ajcxy mjot mhuinma'ñ miid yi' ytiy'ajt, jigix jëbi mnejhuiiygixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuiiygixy nej ymijity yjanchity je pidägy huidibi Dios yegamyb miid tüg'óciy ajcxy huidibi Dios yjäy'ajtip. [19-20](#) Dios nmibijctzooybich jigix jëbi ajcxy mnejhuihuipy jadu'n nej Dios ymic'ajt miidity. Je' ymic'ajt ca' ycixipy ytigoyipy, e ni pin ca quipxipy. Etz yi' ymic'ajt tumb ma iich ajt njot nhuinma'ñ nidüg nidüg co ajt nmibijcim. Dios ti xyajnejhuiyim yi' ymic'ajt huidibi ymiid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi'jiiby tzajpjoty. Yi' iñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi miid Dios. [21](#) Cristo jac mij'ane'min ymiid, jac mic'ajt miid, ca'ydi jacpinjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cömay y'ity nügi, ca'ydi jac pin huidibi cham tzinaayb, etz huidibi jacjiini tzinähuaamni. [22](#) Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuüy Cristo nihuäcpejttäy tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. [23](#) Je mibijcpidijc jadu'n nipaady nej Cristo ñinicx, paady ycixpi yi' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

*Dios chojcpy yjihuiybjäy ajcxy, paady ñidzooccixy  
y'alma*

<sup>1</sup> Ca'ni miich anajty ajcxy mmibijccixy Cristo, ooy anajty mdundigooygixy miid Dios ytiy'ajt, ooy anajty ajcxy mbocymiidity, e jadu'n nipaady nej jihuïy ti m'o'ccixy miid mbocy ajcxy ycixpi etz Dios xyajjugypijccixy huinjemy miid jemybi jugy'ajtin. <sup>2</sup> Co ca'ni anajty miich ajcxy mgöbijccixy mmiipidaaccixy Cristo, ooy anajty mguydungixy naaxhuiñyäy ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yi jäy ajcxy yjot yhuinma'ñ huidibi ca' capxymidoogixy Dios. <sup>3</sup> Ma je tiempo tiibi ñaxy, nañ jadu'n anajty ndzinaayim jadu'n nej yi jacjadyii naaxhuiñyäy ajcxy huidibi capxymidoob yi ca'oybi. Ngapxymidoohuim anajty nniniçx chojcin. Ndundigooyim anajty miid ngi'mjot ngi'mhuinma'ñ. Nguipxyiyim anajty miid yi jacjadyii naaxhuiñyäy ajcxy huidibi Dios tzaachytunaanip miid ypoçy ycixpi, etz nañ jadu'n nmihuaad'ajtim co Dios xychaachytuunim miid ajt nbocy ycixpi. <sup>4-5</sup> Oy ixyipy iich ajt mihuaadity tzaachhypi miid ajt nbocy ycixpi, per Dios mij ooy ti xypa'ayooohuim, e mij ooy ti xychojcim ti xyjihuiyim, paady ycixp tuuñ may'ajt miid iich ajt ycixpi co yajjugypijcy je Cristo. E jadu'n quipxyi miid Jesucristo iich ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ miid iich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin

huïdibi ca' ycixipy ytigoyipy ni mina. <sup>6</sup> Com jadu'n nipaady nej Dios xyajjugypijcim quipxy miid Jesucristo, paady ycixp Dios xymöhuaanim it lugar jiiby tzajpjoty quipxy miid Jesucristo. <sup>7</sup> Jadu'n nej xii tiempo mimb cidacp Dios jadu'n oy tuñ jigix jëbi tiy'ajt nmiid'ajtim jadu'n nej Dios xychojcim xyjhuiiyim etz xypa'ayoohuim mijcajee, etz mijmay'ajt mij'oy'ajt tuun miid iiich ajt ycixpi co nyajpaatim ma Cristo. <sup>8</sup> Miid co Dios miich ajcxy ti xychojccixy ti xyjhuiygixy, paady ycixp yi m'alma ajcxy ti patcixy nüdzooocin co ti mmibijccixy Jesucristo. Ca' nminaanim co tijaty ti mdungixy, paady ycixp yi m'alma ajcxy ti patcixy nüdzooocin. Hue' janchtiy Dios ti xymoogygixy ninigoob ajcxy m'alma nüdzooocin. <sup>9</sup> Ca' nminaanim huin'it jäy ajcxy y'alma nüdzooocin paadip co oybi tungixy. Hue' janchtiy Dios jadu'n ci'm ti yaj'oyiy ninigoob nej jäy ajcxy jëbi patcixy y'alma nüdzooocin, jigix ca' pin jëbi huaad amij agix ñayjhuiyii. <sup>10</sup> Com Dios ci'm ti oyduñ iiich ajt njemybi tzinaayin jugy'ajtin miid je may'ajt huïdibi Cristo ytuun co y'o'cy miid ajt nbocy ycixpi. Jadu'n Dios tuuñ miid iiich ajt ycixpi, jigix jëbi nduunim oyjäy'ajtin ma ajt ndzinaayin. Dios, jecy'ajty ca'ni naaxhuiñybí anajty chondacy, cojy macxy je tiy'ajt jadu'n nej yi'tzocy co nduunim oyjäy'ajtin.

*Jotcujc cham n'ijtim miid Dios, com Cristo xyapocyhuaatzim*

<sup>11</sup> Jadu'n miich ajcxy ocjäymejtzcodii nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudíojäity, e ni ca' miich anajty ajcxy

myajtiy'ajttiyygixy nej huaad mnaydijigixy Dios yjäy. Paady ycixp yi judíojäy ajcxy ymina'ñ co Dios je' yjäy ajcxy, e miich ajcxy ca', miid yi'da'ajty co miich ajcxy ca' myajtiy'ajttiyygixy. <sup>12</sup> Co ca'ní anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judíojäy xycöbijccixy, etz ni ca' anajty mbadaangixy huïdibi Dios y'ahuaniiy ma yi judíojäy ajcxy, etz ni ca' anajty ti mjijp'ijxcixy ma Dios, etz ni ca' miich anajty ajcxy myajpatcixy ma Dios. <sup>13</sup> Jadachambi, miich ajcxy huïdibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ñi'py teemy yojcy miid miich ajcxy mbocy ycixpi. <sup>14</sup> Jesucristo ci'm yaj'oyii je tzip je capxy nej anajty iich ajcxy judíojäy etz miich ajcxy huïdibi ca' yjudíojäity naymidzip'ajtim, e cham jotcujc n'ijtim. Jesucristo ci'm yajtigoy je judíojäy ycötujcin huïdibi anajty tzipcojp capxycopj ma iich ajcxy etz ma miich ajcxy. Jesucristo yajtügmujc judíojäy, etz huïdi ca' yjudíojäity. <sup>15</sup> Jesús miid yci'm ninicx yajtigoy je jecy'ajtypi cötujcin co oy yaj'ögyii cruudzcixy. Co Jesús y'o'cy, huin'it yajtügmujcy judíojäy etz huïdibi ca' yjudíojäity. Huin'it oy yaj'ahuimbity tügpicy jääy jemybi huïdibi Dios yjäy'ajtip. E jadu'n ajcxy yajcijxy yajmay je tzip capxy. <sup>16</sup> Co Cristo oy yaj'ögyii cruudzcixy, huin'it yajcijxy yajnajxy je tzip capxy jadu'n nej yi judíojäy anajty midzip'adyii yi' ajcxy huïdibi ca' yjudíojäity. Etz nañ huin'it Cristo yajtügmujcy yi judíojäy miid huïdibi ca' yjudíojäity. Paady ycixp Dios ycöbiga'nyii judíojäy ajcxy etz huïdibi ajcxy ca'

yjudíojäyity agujc jocujc.

**17** Je Cristo miin anajty ya naaxhuiñ etz capxhuäcxxy oybi tiy'ajt jadu'n nej jëbi ajt nbaatim jocujc'ajtin ma Dios. Ycapxhuäcxyp anajty ma miich ajcxy huïdibi ca' yjudíojäyity, huïdibi ca' anajty miidity Dios ytiy'ajt. Etz nañ jadu'n ycapxhuäcxp Dios ytiy'ajt anajty ma iich ajcxy judíojäy huïdibi jamiid anajty Dios ytiy'ajt.

**18** Miid co Cristo may'ajt ti tuuñ co xy'adigiyyim xyjottigiiyim Dios yjihuiñ ymic'ajt, paady ycixp nidüg'ociy iich ajt nyajpaatim ma Dios jadu'n nej tügpicy jäy, tanto judíojäy etz nañ jadu'n huïdibi ca' yjudíojäyity. **19** Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huïdibi tzinaayb ma ycimmgajp, ca' yjadu'nity nej adzinaaybi ajcxy. Paady ycixp tú'ciy miich ajcxy mnaygomájtzigixy ma Dios miid judíojäy ajcxy. Jadu'n miich ajcxy etz judíojäy ajcxy nipaady cham nej jihuïy ajcxy mdügjuugy mdügmigüg. **20** Miich ajcxy ti mmijpidaaccixy je tiy'ajt huïdibi Jesús y'apóstol ajcxy ti capxhuäcxxy etz je tiy'ajt huïdibi Dios y'ayucnajtzcapxiyyibti capxhuäcxciy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huïdibi jaccopicyip ma je poch'ijx chondägy. **21** Dios jadachambi tiempo ycojyp ymacxyp jadügpicy jäy huïdibi yjää'adaanip huïdibi tügijp mijpidaaccixy Cristo, huïdibi tú'ciy ijtcixyp miid Cristo. Jadu'n jadayaabi tügpicy jäy nipatcixy nej tüg tiyc ma jäy ajcxy Dios ojadajtcixy. **22** Miich ajcxy myajpatp ma Cristo quipxyi miid

nidüg'óciy yi mayjay ajcxy huídibi mijpidacp Dios etz huídijaty miíijtp je Espíritu Santo ma ajcxy yjot yhuinma'ñ, jadu'n miich ajcxy mjugy'ajtín nipaady nej Dios chinaydac.

### 3

*Pablo yi' je' miid cötujcín co capxhuäcxy Dios y'ayuc ma pín ca'yjudíojäity*

<sup>1</sup> Iich Pablo, nyajpatpich pujxtigoty miid co nduuñich ma Jesucristo ytung ma miich ajcxy huídibi ca' yjudíojäity. Paady ycixp nmibijctzooybich Dios miid miich ajcxy m'oy'ajtín ycixpi. <sup>2</sup> Mnejhuíyb ajcxy com Dios mijmay'ajt ti tuuñ miid miich ajcxy ycixpi, paady yi' ti xyajniibicyich ngapxhuäcxibich ma miich ajcxy yi y'ayuc ytíy'ajt. <sup>3</sup> Dios ti xyajnejhuíych yi' ytíy'ajt huídibi jecy'ajty yüch y'ijt. Jada tiy'ajt yinjaty hueeñjaty iich miich ajcxy ti nnijayíygíxy jayíjp'aty. <sup>4</sup> Co miich je necy mgapxiip, huin'it ajcxy mnejhuíhuiipy co iich nnejhuíych je Cristo ytíy'ajt huídibi ijtp yüch. <sup>5</sup> Jada tiy'ajt maabi Jesucristo, Dios ca' ni pín yajnejhuíy jecy'ajty. Jadachambi xii tiempo Dios miid je Espíritu Santo yajnejhuíy Jesucristo ytíy'ajt je Jesús y'apóstoles ajcxy etz je Dios y'ayuc najtzcapxíiybi ajcxy. <sup>6</sup> Jada je' je tiy'ajt huídibi jecy'ajty yüch anajty ijtp, co yi jäy ajcxy huídibi ca' yjudíojäity ypadamyb ajcxy Dios y'oy'ajtín quipxyi miid yi judíojäy ajcxy, etz nañ jadu'n yi' ajcxy yajpaady ma Dios tú'cìy miid yi judíojäy ajcxy, etz nañ jadu'n yi' ajcxy padaangíxy oybi huídibi Dios jecy'ajty yajnímay yi judíojäy co möhuaangíxy pínjaty mibijccíxp Jesucristo.

**7** Dios mijmay'ajt ti tuñ miid iich ninigoob co ti xyajnibicyich jada tung, e xymöyich mic'ajt co ngapxhuäcxibich Jesucristo y'ayuc ytìy'ajt oybi ma yi jay ajcxy huïdibi ca' yjudíojäiyi. **8** Iich jactimmudzip ma yi maybi mibijcpidijc ca'ydi jacpin, per ca' ñejity. Dios may'ajt oy'ajt ti tuuñ ma iich, e ti xypidägyich ma yi' ytung co ngapxhuäcxyich jada oybi tiy'ajt ma jacjadyii jay ajcxy jigix jëbi ajcxy patcixy ma Cristo Jesùs mij'oy'ajtin, huïdibi ca' piñ huinjihuïj jadu'ñyi ymijity. **9** Dios ti xyajnibicyich co ngapxticxibich ma tûg'ociy jay ajcxy je Dios y'ayuc ytìy'ajt oybi huïdibi yuch anajty ijtp. Yi' je' je ayuc huïdibi Dios ti cojy ti macxy jecy'ajty, jadu'n nej yi' tuna'ñ je oybi miid tûg'ociy jay ajcxy. Yi' je' Dios huïdibi ti yajcojtaÿ tûg'ociy tijaty ya naaxhuiñ etz jiiby tzajpjoty yajpatp. **10** Jadu'n Dios capxcödujcy co je tzajpjoty tzinaaybi ajcxy huïdibi ane'min etz mic'ajt miid, tiy'ajt padaangixy ma yi mibijcpidijc jadu'n nej Dios mijhuinma'ñ canaagnax tuñ miid jay ajcxy nidüg'ociy huïdibi mibijccixp Cristo Jesùs. **11** Jadu'n Dios ti cuyduuñ miid ajt nHuindzin Jesucristo jadu'n nej jecy'ajty capxcödujcy. **12** Miid co nyajpaatim ma Jesucristo paady ycixp agujc jotcuje nmigapxiñ nmihuingonim Dios. Miid co nmibijcim Jesucristo paady ca' ndzigihiyim ndzo'yduunim ma Dios yhuinduu. **13** Paady ycixp may'ajt nbijctzooyich miid miich ajcxy co ca' nügi m'ixtigihuäccixy ma ajcxy mmibijcim. Etz ca'ajcxy xyñidajipy xyñimayipyich co tzaachhypi nmínaxyich nyajnaxyich miid miich ajcxy ycixpi. Com miid co ti nyajnaxyich tzaachhypi miid miich ajcxy ycixpi,

paady jëbi miich ajcxy oy'ajtin mbatcixy.

*Cristo chojcp yjihuiyb jäy ajcxy*

**14** Com Dios mijmay'ajt ti tuuñ miid judíojäy etz miid huidibi ca' yjudíojäity, paady njatyhuingoxtinaaybich Dios, iich ajt nHuindzin Jesucristo yTeedy, e nmibijctzooybich Dios miid miich ajcxy ycixpi. **15** Tüg'óciy tzajpjoty tzinaayb etz tüg'óciy naaxhuiñjäy huidibi mibijccixp Dios, jëbi nidüg'óciy yminaangixy: "Dios iich ajt nDeedy." **16** Paady nmibijctzooybich Dios Teedy miid miich ajcxy ycixpi, co Dios je huidibi mic'ajt etz oy'ajt ymiid mijcajee, co xymöhuipy mic'ajt ma ajcxy mmibijcin miid yi' yjihuiñ ymic'ajt huidibi yajpatp ma ajcxy mjot mhuinma'ñ. **17** Dios nmibijctzooybich miid miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ miid co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix jëbi miich ajcxy huidibi mmibijccixp Cristo, jëbi mdzójcixipy mjihiuygixipy mijcajee huinixii huinitiempo je mibijcpidijc etz tüg'óciy jacjadyii jäy. **18** Nañ jadu'n Dios nmibijctzooybich miid miich ajcxy ycixpi co miich ajcxy etz tüg'óciy mibijcpidijc mnejhuiiygixipy jadu'n nej Cristo xychojcim xyjihuiyim mijcajee. E yi' chojcin yjihuiyin jadu'n nipaady nej tüg tijc huidibi jac cixip jac mijip, jac yooñip jac ciicyip ca'ydi ni huidi tijc. **19** Nmibijctzooybich Dios co xyajnejhuiiygixyip xyajhuinjihuiiygixipy nej Cristo xychojcim xyjihuiyim mijcajee nidüg'óciy iich ajt, ixti ca' huaad nhuinjihuiydaayim jadu'n

nej Cristo xychachchojcim xychachjihuiyim. Nmibijctzooybich Dios co xypubéjtcixip, ixti mabaad mmiid'ajttaaygixy Dios y'oy'ajtin.

<sup>20</sup> Jadachambi, cömay Dios y'ity huidibi miic'ajt miid, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, miid je ymic'ajt ycixpi huidi tumb ma iich ajt. <sup>21</sup> Huen tüg'ociy mibijcpidijc ajcxy jäymejtzcixy ojadájtcixy Dios etz Cristo Jesús jabom jabom huinixii huini tiempo. Jadu'n jada. Amén.

## 4

### *Tú'ciy n'ijtim miid Espíritu Santo ycixpi*

<sup>1</sup> Nyajpatpich pujxtigoty miid ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jäy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy. <sup>2</sup> Pidaaccix mjot mhuinma'ñ yung naxy, nicy xeemy jäy'ajtcixy, naymecxtújcigix miñ xyipy, naymi'oyjäy'ajtigixy, jigix ñiguëxigip co mnaychójcigixy mnayjihuíyigixy miñ xyipy. <sup>3</sup> Miid'adipy ajcxy mjot mhuinma'ñ tú'ciy miid je Espíritu Santo ypubejtin jigix jébi mdzinaaygixy jotcuje ca' ma tzip capxy. <sup>4</sup> Nidüg'ociy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'ñ. Dios ti xyhuin'ijxim, jigix jébi quipxyjaty njip'ijxtaayim je oybi huidibi nbadaanim jiiby tzajpjoty. <sup>5</sup> Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jébi nmijpidaacim, etz tügpajc nnibejtím miid

Jesucristo yxi. <sup>6</sup> Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidiyc. Yi' je' huidibi nihuindzin'ajttaayb. Yi' je' huidibi may'ajt tumb miid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinmañ.

<sup>7</sup> Dios may'ajt oy'ajt ti tuñ miid nidüg nidüg iich ajt co Cristo xymooyim mic'ajt, jigix jëbi nidüg nidüg tuunipy Dios ytung nej ypadyii. <sup>8</sup> Paady ycixp jaybety ymiñ ma Dios jadu'n yminañ:

Co Cristo ypättigiiy tzajpjoty, chi ymihdpättigiiy may machjäy, e nañ jadu'n Cristo moy jäy ajcxy mic'ajt (dones).

<sup>9</sup> ¿Nej co jadu'n Dios y'ayuc yminañ co je Cristo ypättigiy tzajpjoty? Hue' je' jadu'n yminañ miid co je Cristo jayijp ycidacy etz ooy ayooy ya naaxhuiñgíxy. <sup>10</sup> Je Cristo yi' je' huidibi cidaac ya naaxhuiñ chooñ tzajpjoty, nañ jadu'n ypättigiiy jadüg'oc tzajpjoty jactim'o'c'am. E yi' je' ymic'ajt yajpatp ma tüg'óciy huidijaty jiiby tzajpjoty etz tüg'óciy huidijaty ya naaxhuiñ. <sup>11</sup> Je Cristo ymooygixyp nidüg nidüg yi' ytumbi mic'ajt. Nijéjity mooygixy mic'ajt jëbi nidiy'ajt'ájtigixy co je' je' je Cristo. Nijéjity mooygixy mic'ajt jëbi najtzcapxiiygixy Dios y'ayuc. Nijéjity mooygixy mic'ajt jëbi capxhuäcxixy yi' y'ayuc. Nijéjity mooygixy mic'ajt jëbi capxhuijcxixy yi' mibijcpidiyc miid Dios ytiy'ajt. Nijéjity mooygixy mic'ajt jëbi yaj'ixpijccixy Dios ytiy'ajt. <sup>12</sup> E jadu'n je Cristo mic'ajt moydaaygixy yi' yjäy, e jadu'n yajni'ixiydaaygixy miid ytung ycixpi. E miid yi' ajcxy ytung yjacyujcpediyp yi' mibijcpidiyc

y'ixpijcın, ixtı mabaad jac miid'adipy ajcxy Cristo y'oy'ajtin. <sup>13</sup> Jadu'n Cristo mic'ajt xymooyım, jigix jëbi nidüg'óciy iich ajt ytügiiyım nmibijcin, etz nañ jadu'n quipxyjaty n'ixpijctaayım Dios y'ung y'ayuc ytı'yajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytı'yajt cixy ca'pxy. <sup>14</sup> Ca' n'idaanım miid ajt nhuinma'ñ nej pi'ctijc yhuinma'ñ ymiiidity. Je pi'ctijc ajcxy janam jadzojc yhuinma'ñ ytigajtzcixy. Jadu'n ajcxy nipaady nej je miy huidibi je poj yajpojmimyb yajpojxijpy. Co cixy ca'pxy nmiiid'ajtim Cristo ytı'yajt, ca' pinjaty xyhuin'iinim miid huing ayuc oymibijcnip huidibi ca' yjanchity. <sup>15</sup> Hue' janchtiy ngapxim je tiy'ajt tiybı miid tzojcın jihuiiyin, jaydëbi njacyeecim ajt nmibijcin etz njacnejhuiiyım tüt'óciy Cristo ytı'yajt jadu'n nej ytuuñ ya naaxhuiñ, je Cristo huidibi nigohuajc'ajtp tüt'óciy mibijcpidijc. <sup>16</sup> Cristo etz je mibijcpidijc nipa\_tp nej tüt' ninicx. Cristo nipa\_tp nej je ninicx cohuajc huidibi ane'mb etz mic'ajt mooyb je ninicx. Etz yi mibijcpidijc nipa\_tp ajcxy nej je ninicx huidibi Cristo y'anemyb etz mic'ajt möy. Ma Cristo tüt'óciy mibijcpidijc mic'ajt patcixy huidibi yajtugiyyip ajcxy ymibijcin etz nañ jadu'n yaj'ítigixy tügmucy. Nidüg nidüg mibijcpı ymic'ajt patcixy ma Cristo, jëbi tungixy Cristo ytung nej ypadyii. E jadu'n yeeccixy nidüg'óciy ma ajcxy ymibijcin, etz nañ jadu'n yajyeeccixy chojcin yjhuiiyin miid ymigügtijc.

*Je jemybi jugy'ajt huidibi nbaatim ma Cristo*

<sup>17</sup> Paady ycixp nnimäyich miich ajcxy etz nyajniibijccixy miid ajt nhuindzin Jesucristo

ycötujcin, co ca' huaad mdungixy loci huinma'ñ huidibi ca' choubaady ma Dios, jadu'n nej jacjadyii jäy ytungixy huidibi ca' mijpidaaccixy ajt nHuindzin Jesucristo. <sup>18</sup> Ca' huaad mdzinaaygixy jadu'n nej jacjadyii jäy ajcxy chinäy miid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinixiibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. <sup>19</sup> Ca' ajcxy ti tzo'ydu'n jihuïy co ytundigooygixy. Ooy ajcxy minicxnajxcixy yi jibic-huinma'ñ. Ooy ajcxy nijot'ajtcixy mijcajee co túngixipy tüg'óciy tijaty jibic-huinma'ñ. <sup>20</sup> Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy Cristo ytiy'ajt, <sup>21</sup> pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi yajpatp ma Cristo. <sup>22</sup> Ti miich ajcxy m'ixpicy co copicy m'ixmajtzcxipy yi jibic-huinma'ñ nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy miid je jibicpi huidibi anajty ajcxy mnijot'ajtcixyp, ci'm anajty mnayhuin'ñigixy. <sup>23</sup> Ixmajtzcx jibicjot jibic-huinma'ñ. Pidaaccix mjot mhuinma'ñ co mguydunaangixy Cristo ytiy'ajt jemybi. <sup>24</sup> Miid'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ miid tudägy'ajtin etz huädz'ajtin.

<sup>25</sup> Paady ycixp ca'huaad m'hindaaccixy, nidüg nidüg cápxcix huidibi janchip miid migügtijc, miid co quipxyjaty nyajpaatim ma Jesucristo.

<sup>26</sup> Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy,

mic'amy ajcxy mjäydigóoygixipy yi mjotmädi  
yajijp ca'ní anajty xií ycídacyñi. <sup>27</sup> Ca'  
mnayyéjcgixy ma je mujcu' co je mujcu'  
xymimadägipy.

<sup>28</sup> Yi jää ajcxy huídibi meetzcixp, huen  
ixmajtzcixy meedzii, etz ijxtähuiipy ytung. Co  
ytunipy ma ci'mdung jëbi pubedipy ajcxy  
ymigügtijc huidibi yajmayajtcixp tijaty.

<sup>29</sup> Ca' mgápxcixipy jibic ayuc. Cápxcix oy ayuc  
huídibi jëbi migüg ajcxy jäygidaaccixy, huídibi  
pubejtp etz yajyeegy je mibijcin, huídibi yejcp  
oy'ajtin ma pin ajcxy amido'ijtp. <sup>30</sup> Ca' huaad  
mgapxcixy mmiydaaccixy ayuc huídibi yajjot-  
maybijcp je Espíritu Santo huídibi Dios yjë'ajtpy. Je  
Espíritu Santo huídibi miich ajcxy miid ma mjot  
mhuinma'ñ, yi' je' huídibi ti'yajt yejcp co miich  
ajcxy Dios yjäy'ájtigixy, co anajty Cristo ymiñ ya  
naaxhuiñ jadüg'oc huin'it mbadaangixy jugy'ajtin  
etz tzinaayin huídibi ca' ycixipy ytigoyipy ni miña.

<sup>31</sup> Yajqueeccix yi jibicpi ma ajcxy mjot  
mhuinma'ñ, jadu'n nej co mjot mhuinma'ñ ta'm  
mjihuiygixy, jadu'n nej co tzojc mjotma'tcootcixy,  
jadu'n nej co mnaymijotmá'tigixy, jadu'n nej  
co mnayhuin'ójigixy nayijp'ójigixy. Ca' huaad  
mmigüg mnigapxcixy mni'ojiiygixy. Ca' jibicpi  
mnijot'ajt'adiitzcixy miid ajcxy mmigüg ycixpi.  
<sup>32</sup> Hue' janchtiy oybi mhuinmáaygixipy miid  
mmigüg ajcxy ycixpi. Nayba'ayóohuigixy nidüg  
nidüg. Nayméecxigix nidüg nidüg. Com nañ  
jadu'n Dios ti huinmecxy miich ajcxy mbocy  
miid co myajpatcixy ma Cristo.

## 5

*Nej jëbi chïnaaygïxy yi Dios yjäy ajcxy*

<sup>1</sup> Com miich ajcxy ñipatpy nejjihuïy Dios y'ung'ájtigïxy, e Dios ooy xychojccïxy xyjihuïiygïxy, paady copicy naychójcigïxy nayjihuïiyigïxy miñ xyipy, jadu'n nej Dios ti xychojccïxy ti xyjihuïiygïxy. <sup>2</sup> Jabom jabom ma mdzinaayin naychójcigix nayjihuïiyigix nidüg nidüg, tím jadu'n nej Cristo xychojcim xyjihuïiyim, e yjugy'ajt yejcy miid ajt nbocy ycixpi, e jadu'n Dios jäygidacy nej Cristo ytun.

<sup>3</sup> Miid co miich ajcxy Dios xyjäy'ájtigïxy, paady tzinaaygïxy miid huädz mjot mhuinma'ñ. Ca' huaad m'oc'ibáatcixyñi m'occapxpáatcixyñi yi töxyjäy migapxtigoyii, etz yi jibic ayuc capxii, yi jibic-huinma'ñ nijot'adii etz yi meeñ adzogii.

<sup>4</sup> Miid co mDios miich ajcxy xyjäy'ajtp, paady ycixp ca' huaad mgápxcixipy ayuc huïdibi tzo'ydu'ñ yejc, ni ca' huaad mgápxcixipy huïdi ca' y'oyjäygidaacnity, etz ni ca' huaad mguxiicci xy m'anidaaccixy, com yi jibic ayuc ca' Dios jäygidägy. Tzoc yajnajxim jäygidaacin ma Dios com Dios ti xyajhuaatzim ajt njot nhuinma'ñ. <sup>5</sup> Janch tiy'ajt jada co pinjaty tundigooyb miid huingbi töxyjäy, pinjaty jibic-huinma'ñ miid, ca' ajcxy padaangïxy pidägy etz oy'ajtin ma Cristo etz ma Dios y'ane'min. Pinjaty meeñ adzojcp, Dios ca' tzocy, tím jadu'n nej yi' ca' tzocy pinjaty ojadajtp tzaadzech etz quipychech. <sup>6</sup> Ca' mnayyéjcigïxy co jäy ajcxy xyhuin'íngïxipy miid ayuc huïdibi ca' ytiy'ajtity ca'p choubaady. Miid co jäy ajcxy capxcixy ayuc huïdibi ca' ytiy'ajtity,

paady ycixpi Dios tzaachytuna'ñ tüg'óciy jääjajcxy huidibi capxycömidodacp yi' y'ayuc. <sup>7</sup> Ca' huaad miich ajcxy mnaymigüg'ájtigixy, ca' miid mnayyöymújcigixy yi' jadu'mbi jääjajcxy huidibi ca' capxymidoogixy Dios.

<sup>8</sup> Jayijp ca'ní anajty mmibijccixy Cristo, ca'ní anajty Cristo ytiy'ajt ajcxy mnejhuiy, e jadu'n nipaady anajty nej jihiyi myajpaady ajcxy agoootztuum. Jadachambí mnejhuiygixyp Cristo ytiy'ajt, e jadu'n nipaady nejjihuïy mdzinaaygixy ma tüg tiicxin. Paady ycixp jatyim cuydungixyp Cristo ytiy'ajt ma yi' mdzinaayin mjugy'ajtin ajcxy, jadu'n nej jëbi huaad quexixy co mmibijccixy Cristo. <sup>9</sup> Co nmii'd'ajtim Cristo ytiy'ajt, chi nduunim huidibi y'oyip, huidibi tudägyip, huidibi tiy'ajtip. <sup>10</sup> Ixpijccix je tiy'ajt huidibi Dios yjäygidacpy. <sup>11</sup> Ca' miich ajcxy mnaymigüg'ájtigixy miid yi' jääjajcxy huidibi yajpatcixp agoootztuum, huidibi tungixy huidibi Dios ca' jäygidägy. Miich ajcxy capxhuijcix miid Dios ytiy'ajt yi' ajcxy huidibi agoootztuum tzinaayb. <sup>12</sup> Tzo'yduunim ajt co jay nigapxcixy nimiydaacci xy je jibicpi huidibi ajcxy ytumyb ayüch ameech. <sup>13</sup> Co n'ixquipxim yi' jadu'mbi jääjajcxy ayuc miid Dios y'ayuc, chi niguexixy pen janch tiy'ajt o pen ca' ytiy'ajtiy, jadu'n nipaady nej ti nyajpidzimim je ajcxy ayuc ma yi' agoootztuum, etz nbidaacim ma yi' tiicxin. <sup>14</sup> Paady ycixpi Dios y'ayuc jadu'n yminañ:

Mäyhuijip miich ajcxy huidibi jadu'n nipatp nejjihuïy mdzachmaagixyp. Jugypijccix miich ajcxy huidibi jadu'n nipaady nejjihuïy ti m'öccixy. Cristo xycodiicxcixipy

miid yi' ytiy'ajt.

**15** Paady naygüend'ájtigixy huídibi tiy'ajt yajtungixp ma yi chınaayin. Tzinaaygix jadu'n nejjihuüy mnejhuiygixy Cristo ytiy'ajt, e ca' mdzinaaygixy jadu'n nej huídibi ajcxy ca' nejjihuüygixy Cristo ytiy'ajt. **16** Ni'ix'iijtcix jabom jabom jébi mguydungixy Cristo ytiy'ajt. Jadachambi xii tiempo mayjäy ytundigooygixy miid Cristo ytiy'ajt. **17** Ca' loci huinma'ñ myajtungixy, per nejhuiygixyp nej Dios tzocy co mdúngixipy. **18** Ca' huaad m'ijtcixy amügy jääy, com yi jocnii xyajníxcxicipy ayo'nduum. Nígí oy m'ijtcixy Dios yjihui'ñ ymic'ajt may'amy ma ajcxy mjot mhuinma'ñ. **19** Naymigápxigixy miñ xyipy miid yi salmo ayuc, miid yi himnos. Huin'ügix Dios miid je iy huídibi je Espíritu Santo xymooygixyp. Huin'ügix etz ojadajtcix Dios cixyjot huinijot. **20** Jatyim yajnajxcixy jabom jabom jäygidaacín ma ajt nDios Teedy ma ajt nHuindzin Jesús yxii, miid tüg'óciy ycixpi nej ndunim n'ayooihuim.

### *Nej huaad chinaaygixy pinjaty picychinaaygixy*

**21** Miid co miich ajcxy mhuindzigüy Dios, paady ycixp miich ajcxy mnayyajmij'ájtigixy mnaygapxymidoohuigixy miñ xyipy.

**22** Miich ajcxy töxyjäydijc yajmij'ajtcix capxymidoogix yi mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo. **23** Com je töxyjäy ñäy nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huídibi nihuänamb yajnidzögamb yi mibijcpidijc. **24** Tim jadu'n nej yi mibijcpidijc capxymidoogixy

Cristo, nañ tím jadu'n tzocy co je töxyjäy ajcxy capxymidóogixipy yi ñäy ajcxy.

**25** Nañ jadu'n tzocy co je yëydijc huen tzocy jihuÿ ytöxyijc, tím jadu'n nej Cristo tzocy jihuÿ yi mibijcpidijc, e paady ycixp yejc yi' yjugy'ajtìn miid yi' ajcxy ycixpi. **26** Cristo yejc yjugy'ajtìn miid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'ñ. Cristo yajhuaatzí yi mibijcpidijc ajcxy yjot yhuinma'ñ miid yi'yayuc etz co nibejt ajcxy miid nii. **27** Jadu'n Cristo yajhuäch yi mibijcpidijc ajcxy yjot yhuinma'ñ, jigix jëbi ajcxy nayguëxigÿyb ma yi' yhuinduu miid huädz yjot yhuinma'ñ. Je mibijcpidijc ajcxy nipaady nej tûg nijen huidibi huädzip, ca' ma ytiy ymächity. **28** Jadu'n tzocy co je yëydijc huen tzocy jihuÿ ytöxiyc tím jadu'n nej ci'm naychogyii. Yi yëydijc huidibi tzojcp jihuÿyb ytöxyijc nañ jadu'n ci'm ñaychogyii. **29** Ca' ji ni piñ huidibi ca' ñaychogyii ci'm. Hue' janchtiy ycuend'ajtpy etz yajcüxyii yajpediyii ycim ninicx, tím jadu'n nej jääy ajcxy cuend'ajtcixy ycim ñinicx nañ tím jadu'n Cristo ycuend'ajtpy yi mibijcpidijc. **30** Jadu'n Cristo cuend'ajtpy yi' yjääy, com jadu'n ajcxy nipaady nej yi' ñinicx. **31** Com copicy je yëydijc tzogip jihuÿhuip ytöxyijc jadu'n nej Cristo tzocy jihuÿ yi mibijcpidijc. Paady ycixp je yëydijc ixmadzipy ytaj yteedy, e y pudigihuipy ytöxyijc, e jadu'n ajcxy chinähuiipy nej jihuÿ ytügpajcity. **32** Ooy chachmijhuinma'ñity jada tiy'ajt huidibi yüch anajty ijtp, e yi' iich jadu'n tijpy yi Cristo etz je mibijcpidijc. **33** Cuendipijccix jada tiy'ajt co nidüg nidüg miich yëydijctijc ajcxy huidibi pijccixp

copicy mdzogipy mjihuïhuipy ajcxy mdöxyijc, tím jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy ñäy.

## 6

<sup>1</sup> Pi'ctijc ajcxy huïdibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n. <sup>2</sup> Yí Dios ycötujcin huïdibi minaamb: "Yajmij'ajtcix mdaj mdeedy", yi' ooy ytímycopicyity. Nañ jadu'n co nguyduunim jada cötujcin, huin'it Dios jecy xyajtzinaayim. <sup>3</sup> Co miich ajcxy jadu'n myajmij'adipy mdaj mdeedy, huin'it Dios xymöhuipy ajcxy jotcujc'ajtin, e nañ jadu'n xyajtzináaygixipy jecy ya naaxhuiñ.

<sup>4</sup> E miich ajcxy huïdibi ungdeedy'ajtcixp, ca' nigoo myajjotma'tcotcixy yi m'ung ajcxy. Ane'mgix yajyeeccix yi m'ung ajcxy miid Dios y'ayuc ytíy'ajt, jaydëbi capxymidoogixipy ajcxy Dios.

<sup>5</sup> Miich ajcxy huïdibi tumbi'ajtp ya naaxhuiñ, capxymidoogix yi mhuindzin ajcxy, etz tungix miid tudägy'ajtin, etz yajmij'ajtcix etz tzigiiygix. Tím jadu'n nej jihuïy mgapxymidoogixy yi mHuindzin Jesucristo.

<sup>6</sup> Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jím xyhuindiixcxicxy, e chi co je' yjihuäcni, chi nigoo mhuäccixni mdináaygixni. Tungix jadu'n nej huaad jää ytuungixy yi huïdibi mijpidaaccixp Jesucristo. Tungix cixyjot huiniyot jadu'n nej Dios tzocix mdúngixipy.

<sup>7</sup> Tumbidijc ajcxy, tungix mdung cixyjot huiniyot, tím jadu'n nej jihuïy mdungixy je

Huindzin Jesucristo ytung, e ca' yjäydungity.  
<sup>8</sup> Mnejhuiyib miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuuñ, ca' ñejity pen yc'i'mdung yatumyb, o pen ytumb miid tüt huindzin.

<sup>9</sup> Miich ajcxy huidibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiyyigixipy ca' mdzaachytungixipy. Ajihuúiyigixy co miich ajcxy etz nañ jadu'n mdumbi ajcxy miid ajcxy mHuindzin tzajpjoty, e yi mHuindzin tzajpjotypi quipxyjaty tiyduna'ñ nidüg'óciy miich ajcxy.

*Je mic'ajt huidibi je mibijcpidijc ajcxy ypatcixyp  
miid Dios yjihui'ñ*

<sup>10</sup> Jadügnax, migügtiyc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt miidity, paady jëbi miich ajcxy mbatcixy yi mmic'ajtin ma yi'.

<sup>11</sup> Naygohuaanigixy miich ajcxy ma je mujcu' miid tüt'óciy tiy'ajt huidibi Dios xymooyim, huidi miid naygohuaanim ma je mujcu', e jadu'n ca'ydi je mujcu' xymimadaacim miid anii. Jadu'n Dios ytiy'ajt nipaady nej tujt etz pujxnijen huidibi soldados ajcxy miid naygohuaangixy tzipjoty.

<sup>12</sup> Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüt'óciy mic'ajt miidpi huidibi midzip'ajtp Dios ya naaxhuiñ etz jiiby tzajpjoty, ca'p iich ajt nmidzip'ajtim naaxhuiñjäy. <sup>13</sup> Paady ycixp yajtungixy tüt'óciy mic'ajt etz tiy'ajt huidibi Dios ti xymooygixy, jigix jëbi mmimadaaccixy je ca'oybi co anajty xyajtundigoyaangixy. E jadu'n jëbi mimadaaccixy

je ca'oybi miid ajcxy mmibijcin. E co anajty ti mmimadactaaygixy, huin'it m'ijtcixipy mic ma ajcxy mmibijcin. <sup>14</sup> Ca' m'ixtigihuäccix ma ajcxy yi mmibijcin. Nayñi'ixiiyigix miid Dios ytiy'ajt, jadu'n nej jay ajcxy ñayhuindädzigixy co ytunaangixy. Nayñi'ixiiyigix tim jadu'n nej soldados ajcxy ñayñi'ixiiyigixy miid pujx nüen ma caach co chiptunaangixy. <sup>15</sup> Nayñi'ixiiyigix miid Dios y'ayuc, jigix jebi ajcxy nícxy mgapxhuacxi Dios y'ayuc huidibi jocujc'ajtin yejcp. Co jadu'n mdungixipy, jadu'n nibaadip tim jadu'n nej soldados ajcxy ñayñi'ixiiyigixy co yajtigiiygixy yzapato co ytüyöyaangixy. <sup>16</sup> Yi' huidibi jac copicyip ca'ydi jac ni ti, mibijccix tiydudägy Jesucristo. Miid ajcxy yi mmibijcin jebi mnaygoihuáanigixy ma je mujcu'. Miich ajcxy mmibijcin jadu'n nipaady nej tüt escudo huidibi je soldados ajcxy yajtumyb co ñaygoihuáanigixy ma je tip huidibi yajnajtziibiiyb miidi jiin. <sup>17</sup> Nayñi'ixiiyigix miid Cristo ytiy'ajt huidibi miid ajcxy m'alma xyajnidzoocip, tim jadu'n nipaady nej soldados ajcxy ñaygoihuáanigixy co pidaaccixy ypujx cöjup co chiptunaangixy. Naygoihuáanigix miich ajcxy miid Dios y'ayuc huidibi jadu'n nipatp nej tüt espada huidibi je Espíritu Santo ti xymooygixy. <sup>18</sup> Mibijctzoogix Dios miid tüt'ociy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom miid je Espíritu Santo ypubejtin. Huijy ycujc m'ijtcixipy, ca' mjotmetzciiygixipy. Mibijctzoogix Dios miid tüt'ociy mibijcpidijc ajcxy ycixpi. <sup>19</sup> Nañ jadu'n mibijctzoogix Dios miid iich ycixpi, co huen xymöyich ayuc etz jocujc'ajtin,

jigix jëbi ngapxhuäcxibich huinmic jotmic yi' y'ayuc ytiy'ajt huïdibi ca' piñ jecy'ajty nejhuiiygixy. **20** Dios ti xyajnibicyich jada tung jëbi nyajnicxyich yi' y'ayuc ytiy'ajt ma je mayjäy ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios miid iich ycixpi co xyajjotmicpigipyich jigix jëbi ngapxhuäcxyich yi' y'ayuc huinmic jotmic.

### *Capxpoocxin huidibi cogixiiyñip*

**21** Ooy ndzocy njihuïyich je Tíquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tíquico miich ajcxy xyajmiidmiydägipy tûg'óciy je tiy'ajt nej nyajpaadyich ya, etz tûg'óciy tung huïdibi ya ndumybich. **22** Nguexaamybich Tíquico ma miich ajcxy jigix jëbi xymiidmiydägipy ajcxy jadu'n nej nyajpaadyich ya, e miid jada tiy'ajt jëbi miich ajcxy mjotcugiygixy.

**23** Huen Dios Teedy etz ajt nHuindzin Jesucristo may'ajt tunipy miid miich ajcxy, jigix jëbi jotcuje mdzinaaygixy, etz nañ jadu'n jëbi mnaychójcigixy mnayjihuïyigixy miñ xyipy, etz jigix jëbi mjacmibijccixy Cristo. **24** Huen Dios may'ajt oy'ajt tunipy miid miich ajcxy huïdibi yajmij'ajtcixp ajt nHuindzin Jesucristo huinixii huinitiempo. E ca' m'ixmájtzcixip nimina nej ajcxy mijpidaacciixy Jesucristo. Jadu'n jada. Amén.

## **El Nuevo Testamento en mixe de Coatlán New Testament in Mixe, Coatlán (MX:mco:Mixe, Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

### **Copyright Information**

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Mixe, Coatlán

### **© 1976, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
4190de74-18ab-52cf-ba4e-5f99ab05892f